

SURAT LAYANG DARI KACAMATA PEMIMPIN UMNO

KUALA LUMPUR, 6 Nov (Bernama) -- Surat layang terus mendapat perhatian para perwakilan UMNO, masing-masing dengan tafsiran tersendiri.

Berikut adalah petikan kata-kata pemimpin dan perwakilan UMNO mengenai perkara itu pada perhimpunan agung UMNO hari ini.

+Surat layang yang mengandungi fitnah dan butir-butir rahsia parti telah diedarkan+ -- Presiden Umno Datuk Seri Dr Mahathir Mohamad ketika membentangkan ucapan dasar.

+Dalam kemajuan industri, sudah ada industri mengeluarkan surat layang dan ini boleh meruntuhkan parti yang perlu diperangi habis-habisan+ -- Menteri Besar Johor Tan Sri Muhyiddin Yassin ketika bercakap kepada pemberita semasa waktu rehat perhimpunan agung.

+Yang pelik surat layang ini dialamatkan dengan tepat kepada anggota-anggota di Sabah, mungkinkah berlaku kebocoran alamat di peringkat ibu pejabat+ -- Abdul Ghafoor Salleh dari Sabah ketika membahaskan usul, terima kasih ucapan Presiden.

+Saya tak fikir Setiausaha Agung Umno Datuk Mohamed Rahmat terlibat dalam surat layang... sebagai Menteri Penerangan dia boleh menggunakan televisyen terbang+ -- Datuk Abdul Rashid Ngah dari Terengganu mengulas +kebocoran alamat+ yang disebutkan Ghafoor ketika membahaskan usul yang sama.

+Anggota Umno hendaklah menjadikan surat layang bahan bakar dan bungkusan barang runcit+ -- Shahidan Kasim dari Perlis ketika membahaskan usul terima kasih ucapan Presiden. -- Bernama